

# S'occupar cun democrazia – sco politolog e giurist

In scienza rumantsch lavura en il Center per democrazia ad Aarau

DA CLAUDIA CADRUVI / ANR

■ **In politolog e giurist che cumpone-scha gugent ed ha pli baud sunà tar ils Bulais sexuals. Co va quai ensemen? In inscunter cun Corsin Bisaz.** L'emprim rauinta el cun in surrir scharmant e cun ina mimica forsa in zichel da furber. Da sia uffanza a Ftan e Haldenstein e co ch'el ha da mat ina giada pudì giugar teater en la DDR. U co ch'el ha gudagnà sco student ses daners cun lavurar a la bar dal «Crazy Cow» u en il «Kaufleuten» e perfin sco headhunter.

Cun raschunar da sia lavur daventa sia fatscha seriusa, magari forsa bunamain in zic reservada. El explitgescha sia incumbensa en il Center da democrazia ad Aarau e la tematica da sia habilitaziun. Bisaz sa fatschenta cun process da democratisaziun en il Sudan ed en la Mongolia. E cun la teoria davart la democrazia en noss pajais.

## Cun il pin en Val Tasna

«Per mai è Ftan il lieu nua ch'jau tutg», di Corsin Bisaz malgrà ch'el ha vivi là be trais onns ed è creschì si uschiglio en la regiun da Cuira. Durant las vacanzas da stad è el adina stà en l'Engiadina tar ses parents a Tarasp e Ftan, ha fatg fain u accumpagnà ses pin, il guardiachtscha, en la Val Tasna. «En Val Tasna, en la chamona da mes parents, ma sent jau il pli fitg da chasa.»

En la scola Steiner a Cuira ha Corsin fatg teater ed è uschia schizunt vegnì tar rollas en ensembles professiunals. Sco «Uorsin» è el stà sin turnea svizra e cun dudiesch onns ha el giugà in mat en «Antigone» da Bertold Brecht. Ins ha dà il toc era en il Berliner Ensemble en la DDR – paucas emnas avant la crudada dal mir.

Avant il hotel, nua che la gruppa da teater abitava a Berlina, è marschada sperasora in di la parada militar per il giubileum da 40 onns. Bisaz sa regorda: I aveva strusch aspectatur sper via. L'imposanta parada en preschientscha da Gorbatschov pariva sco inscenada. Quai steva en cuntrast cun la tensiun en il teater. Durant la preschentaziun da l'Antigone steva il publicum adina puspè si e sblatschava. I sa tractava d'in toc fitg critic per la DDR. Mintgin saveva che la reacziun dal publicum vegniva observada e registrada dal reschim.

## Student cun ina pruna jobs

Sco gimnasiast ha el vulì studegiar archeologia u forsa istorgia. «Cler era en mintga cas ch'jau na fetschia mai fisica e



Corsin Bisaz abitescha a Turitg ed è bab da trais uffant pitschens.

FOTO C. CADRUVI

mai giurisprudenza», rauinta Bisaz cun in surrir. Cura ch'el ha dudì da politologia era la chaussa clera, damai ch'el legeva gea adina en las gasettas mo las paginas cun la politica da l'exteriur.

A Turitg sco student da politologia ha el gudagnà ses daners cun ina pruna differents jobs: sco magister, en restaurants e bars, sco giuven headhunter u sco secretari da la fundaziun Convivenza.

Gia en il gimnasi a Schiers aveva el sunà en pliras bands. A Turitg è el daventà ghitarrist dals Bulais sexuals, ina gruppa da rock rumantscha. El ha scrit tocs per la band. Anc oz cumpona el gugent cun sia ghitarra.

## Tuttina anc giurisprudenza

Durant il studi ha el cumentà a s'interessar per la soziologia da dretg. Bisaz avess gugent fatg ina dissertaziun davart il dretg da pievels. En politologia n'è quai betg stà pussaivel ed el è sa decidì da far anc in segund lizenziat: en giurisprudenza.

Quest studi ha el terminà entaifer quatter onns e scrit ina lavur da doctorat cun il titel «The Concept of Group Rights in International Law». El ha survegnì in stipendi ed ha pudì ir sco scienzià a Lund en Svezia.

Suenter dus onns è Bisaz turnà en Svizra, nua ch'el ha vulì cuntinuar a lavurar sco scienzià. Il Center per democrazia ad Aarau (ZDA), ch'è collià cun

l'università da Turitg, tschertgava il 2011 gist in giurist.

## Democrazia en il Sudan ed en la Mongolia

«Jau sun extrem fortunà», di Bisaz da sia piazza. «Jau n'avess mai pensà ch'i dettia ina tala lavur, nua che in project è pli interessant che tschel.» Per exempel l'expertisa giuridica davart la constituziun en il Sudan dal sid. Il ZDA ha survegnì l'incumbensa d'examinar questa constituziun nova. Da leger ils passaduatschient artitgels na crodi l'emprim mument si nagut, di Bisaz. Chatter ils problems saja cumplitgà. Pir cun il temp hajan ins badà: tschertas parts èn stadas influenzadas da l'UNO, autras dals Americans e dals Tudestgs. Plinavant cunteneva questa constituziun suenter in'enumeraziun da cumpetenzas per il guvern anc la remartga che la regenza saja uschiglio era responsabla per tuttas autras chaussas impurtantas. Talas formulaziun innocentas avran ad in guvern la pussaivladad d'agir sco quai ch'i para e plascha.

En in auter project accumpogna il ZDA la democratisaziun en la Mongolia, in pajais cun bieras ressursas da mineralias, nua ch'ils daners restan fin uss mo en paucs mauns. Era là examinescha Bisaz las leschas e dat giu parairis.

Sper sia lavur en il ZDA scriva Bisaz ina habilitaziun. En lezza intercuera el la

teoria per la democrazia directa en Svizra.



## Curt e bun

*Naschi:* il 20 d'avrigl 1977

*Creschì si a:* Ftan e Haldenstein

*Abitescha a:* Turitg

*Maridà cun:* Anita Bisaz Götsch

*Uffants:* Andri, Alena, Kimon

*Studegià:* politologia, giurisprudenza

*Musica preferida:* Muse, Placebo, Beethoven

*Instruments preferids:* ghitarra, giun

*Filosof:* Jean-Jacques Rousseau

*Fascinà da:* la Mongolia

*Sport:* rampagnar, hockey